

## **Pemikir Ekonomi Islam Terawal**

IMAM Muhammad Bin Hassan Al Shaybani adalah salah seorang daripada dua anak murid tersohor Imam Abu Hanifah. Seorang lagi anak muridnya ialah Imam Abu Yusuf terkenal dengan kitabnya, Al Kharaj.

Imam Muhammad juga merupakan anak murid kepada Imam Malik Bin Anas. Beliau lahir pada tahun 131 Hijrah dan wafat pada tahun 189 Hijrah. Beliau yang merupakan seorang tokoh salaf yang alim dan warak telah menjadi guru kepada tokoh-tokoh ilmuan agung seperti Imam Al-Syafie dan Abu Hafs Al-Bukhari Al-Kabir.

Imam Al-Haskafi di dalam kitab Ad-Dur Al-Mukhtar menyatakan bahawa para fuqaha menyimpulkan: “Ilmu Fikah ditanam oleh Abdullah bin Mas’ud, disiram oleh ‘Alqamah, dituai oleh Ibrahim An-Nakha’ie dan dikumpul oleh Hammad. Kemudian Abu Hanifah menukarkannya menjadi tepung, Abu Yusuf mengulinya dan Muhammad bin Hassan menjadikan ia sebagai roti. Seluruh manusia kemudiannya memakan roti itu daripadanya.”

Istilah Al-Kasb merangkumi semua bentuk pekerjaan termasuklah perniagaan, pembuatan, penternakan dan pertukangan demi tujuan mendapatkan pendapatan.

Tema ini diulas di dalam sebuah buku khas buat pertama kalinya oleh Imam Muhammad yang kemudiannya disusuli oleh Imam Abu Abdullah Ahmad Ibn Harb Al-Naisaburi (wafat 234 Hijrah) mengulas perkara sama dalam kitab Al-Takassub.

Para ulama kemudian mengulas tajuk perolehan pendapatan sama ada dalam kitab yang khusus ataupun sebagai salah satu topik di dalam karya mereka seperti yang dilakukan oleh Imam Abu Hamid Al-Ghazali dalam Ihya’ ‘Ulumuddin.

Menurut Imam Sarkhasi, sebenarnya Imam Muhammad menulis kitab ini dalam bab zuhud/tasauf. Ini berdasarkan pertanyaan yang dibuat setelah beliau menyelesaikan penulisan bermacam-macam kitab: “Adakah Tuan Imam tidak menulis sesuatu tentang zuhud? (pada zaman itu ilmu tasawuf digelar ilmu zuhud atau riqaq).” Imam Muhammad menjawab: “Aku ada menulis kitab dalam bab Buyu’ (jual beli).”

Menurut Syeikh Abdul Fattah Abu Ghuddah, Imam Muhammad seolah-olah memberi isyarat daripada jawapannya, apabila seseorang itu baik cara perolehan hartanya, maka akan baiklah amalannya.

Tidak lama kemudian Imam Muhammad menulis buku khas tentang zuhud dan warak merangkumi lebih kurang seribu bab. Bagaimanapun, beliau wafat sebelum sempat menyempurnakannya. Hanya bab-bab awal yang sempat diselesaikan dan itulah kitab Al-Kasb.

Antara topik-topik besar yang disentuh di dalam kitab Al-Kasb ialah kewajipan mencari pendapatan ke atas setiap Muslim, mengambil asbab tidak menafikan tawakal, jenis-jenis

pendapatan dan khilaf pekerjaan yang paling afdal, pemberian infaq dan batasan membazir serta berjimat dalam perbelanjaan selain fadilat membantu sesama manusia dan kewajipannya.

### **Soalan Menarik**

Di samping itu, kita akan terjumpa beberapa soalan menarik yang dikupas oleh Imam Muhammad seperti adakah kefakiran lebih afdal daripada kekayaan, manakah yang lebih baik antara bersyukur dengan kekayaan atau bersabar dalam kemiskinan dan kewajipan menuntut ilmu walaupun kesibukan.

Imam Muhammad bukan sekadar menyentuh isu hukum hakam perbelanjaan, beliau juga merupakan cendekiawan Muslim pertama yang menulis tentang ekonomi kewangan apabila memasukkan sebuah bab Harta di dalam Islam dari sudut pendapatan, penyimpanan dan pengeluaran dalam kitab Al-Kasb.

Imam Muhammad sungguh mematuhi perjalanan pasaran seperti yang diriwayatkan oleh Al-Hassan bin Syahrab: “Aku telah melihat Muhammad bin Hassan bertemu dengan para pewarna baju dan bertanya tentang perniagaan mereka serta perjalanan urus niaga sesama mereka.”

Begitulah prihatinnya Imam Muhammad dalam mematuhi masalah urus niaga termasuk melakukan hubungan langsung dengan industri perniagaan pada zamannya.

Dalam kitab ini, Imam Muhammad bukan sahaja mengupas aktiviti-aktiviti ekonomi utama seperti pekerjaan dan perbelanjaan secara mendalam, tetapi beliau menghuraikan persoalan hukum dan nilai akhlak Islam dalam perlaksanaan aktiviti-aktiviti tersebut dengan cemerlang. Secara keseluruhannya, kitab ini dianggap antara karya terawal dan terpenting yang membahaskan pemikiran ekonomi Islam secara serius dan mendalam.

Pada tahun 2011, kitab Al-Kasb sudah diterjemah oleh Dr. Adi Setia dan diterbitkan oleh Islamic Banking & Finance Institute Malaysia (IBFIM) dalam bahasa Inggeris. Moga karya yang baik ini akan mendidik jiwa kita dalam memastikan setiap perlakuan harian dalam bidang pekerjaan membawa kesan tazkiah (penyucian jiwa) kepada diri dan menghasilkan barakah dalam setiap usaha yang dilaksanakan.

### Artikel

Penuh: [http://www.kosmo.com.my/kosmo/content.asp?y=2015&dt=0219&pub=Kosmo&sec=Rescana\\_Utama&pg=ru\\_03.htm#ixzz3XRIgQrKy](http://www.kosmo.com.my/kosmo/content.asp?y=2015&dt=0219&pub=Kosmo&sec=Rescana_Utama&pg=ru_03.htm#ixzz3XRIgQrKy)

Hakcipta terpelihara